

廣廣文選

第拾伍冊

書類

漢書門類	二一〇八六號
函架	二四四
冊	二五

二一〇八六
二四四
二五

內閣文庫	
番號	漢 11086
冊數	25(16)
函號	361 41



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





廣廣文選卷之十五

淺草文庫

四明 周應治 纂

嶺南門人彭必鳴校

書



上謹言書

周朗

昔仲尼有言治天下若寘諸掌豈徒言哉方策之政息舉在人蓋當世之君不為之耳况乃運中澆暮世膺亂餘重以宮廟遭不更之酷江服被未有之痛千里連死萬井共泣而秦漢餘

廣文選 卷之十五
敝尚行於今魏晉遺謬猶布於民是而望國
安於今化崇於古卻行及前之言積薪待然
之譬臣不知所以方然陛下既基之以孝又
申之以仁民所疾苦敢不略薦凡治者何哉
為教而已今教衰已久民不知則又隨以刑
逐之豈為政之道歟欲為教者宜二十五家選
一長百家置一師男子十三至十七皆令學經
十八至二十盡使脩武訓以書記圖律忠孝仁
義之禮廉讓勤恭之則授以兵經戰略軍部舟

騎之容挽疆擊刺之法官長皆月至學所以課其
能習經者五年有立則言之司徒用武者三年善
執亦升之司馬若七年而經不明五年而勇不達
則更求其言政置謀迹其心術行履復不足取者
雖公卿子孫長婦農畝終身不得為吏其國學則
宜詳考占數部定子史令書不煩行習無糜力凡
學雖凶荒不宜廢也農桑者實民之命為國之本
有一不足則禮節不興若重之宜罷金錢以穀帛
為賞罰然愚民不達其權議者好增其異凡自淮

唐書卷之五十五
書卷之五十五
一
以北萬匹為市從江以南千斛為貨亦不患其難也今且聽市至千錢以還者用錢餘皆用絹布及米其不中度者坐之如此則墾田自廣民資必繁盜鑄者罷人死必息又田非膠水皆播麥菽地堪滋養悉執紵麻蔭巷緣藩必樹桑柘列庭接宇唯植竹栗若此令既行而善其事者庶民則叙之以爵有司亦從而加賞若田在草間木物不植則撻之而伐其餘樹所在以次坐之又取稅之法宜計人為輸不應以貲云何使富者不盡貧者不蠲乃

令桑長一尺圍以為徭田進一畝度以為錢屋不得瓦皆責貲實故以此樹不敢種土畏妄墾棟焚椽露不敢加泥豈有利善害民禁不惡食若此甚者方金若重斯農則宜務削茲法凡為國不患威之不立患恩之不下不患土之不廣患民之不育自華夷爭殺戎夏競威破國則積屍竟邑屠將覆軍滿野海內遺生蓋不餘半重以急政嚴刑天災歲疫貧者但供吏死者弗望糴鰥居有不願娶生子每不敢舉又成淹徭久妻老嗣絕及媯奔所孕

廣廣文選 卷之五
皆復不收是殺人之日有數途生人之歲無一理
不知復百年間將盡以草木為世邪此最是驚心
悲魂慟哭太息者法雖有禁殺子之科設蚤娶之
令然觸刑罪忍悼痛而為之豈不有酷甚處邪令
宜家寬其役戶減其稅女子十五不嫁家人坐之
特雉可以聘妻妾大布可以事舅姑若待足而行
則有司加糾凡宮中女隸必擇不復寧者庶家內
役皆令各有所配要使天下不得有終獨之生無
子之老所謂十年存育十年教訓如此則二十年

間長戶勝兵必數倍矣又亡者亂郊饑人盈甸皆
是不為其存計而任之遷流故饑寒一至慈母不
能保其子欲其不為寇盜豈可得邪既御之使然
復止之以殺彼於有司何酷至是且草樹既死皮
葉皆枯是其梁肉盡矣冰霜已厚苦蓋難資是其
衣裘敗矣比至陽春生其餘幾今自江以南在所
皆穰有食之處須官興役宜募遠近能食五十口
一年者賞爵一級不過千家故近食十萬口矣使
其受食者悉令就佃淮南多其長帥給其糧種凡

公私遊手歲發佐農令堤湖盡脩原陸並起仍量
家立社計地設閭檢其出入督其游惰須待大熟
可移之後舊淮以北悉使南過江東旅客盡令西
歸故毒之在體必割其緩處函渭靈區間為荒窟
伊洛神基蔚成茂草豈可不懷歟歷下泗閒何足
獨戀議者必以為胡衰不足避而不知我之病甚
於胡矣若謂民之既徙狄必就之若其來從我之
願也胡若能來必非其種不過山東雜漢則是國
家由來所欲覆育既華得坐實戎空自遠其為來

利固善也今空守孤城徒費財役亦行見淮北必
非境服有矣不亦重辱喪哉僕虜但發輕騎三千
更互出入春來犯麥秋至侵禾水陸漕輸居然復
絕於賊不勞而邊已困不至二年卒散民盡可躋足
而待也設使胡滅則中州必有興者決不能有奉
土地率民人以歸國家矣誠如此則徐齊終逼亦
不可守且夫戰守之法當恃人之不敢攻頃年兵
之所以敗皆反此也今人知不以羊追狼蟹捕鼠
而令重車弱卒與肥馬悍胡相逐其不能濟固宜

矣漢之中年能事胡者以馬多也胡之後服漢者亦以馬少也既兵不可去車騎應蓄今宜募天下使養馬一匹者蠲一人役三匹者除一人為吏自此以進階賞有差邊亭徼驛一無發動又將者將求其死也自能執干戈幸而不亡筋力盡於戎役其於望上者固已深矣重有澄風掃霧之勲驅波滌塵之力此所自矜尤復為甚近所功賞人知其濃然似頗謬虛實怨怒寔衆垂臂而反脣者往往為部耦語而呼望者處處成群凡武人意氣特易

崩沮設一旦有變則向之怨者為敵也今宜國財與之共竭府粟與之同罄去者應遣濃加寵爵發所在祿之將秩未充餘費宜闕他事負輦長不應與唯可教以蒐狩之禮習以鈺鼓之節若假勇以進務黜其身老至而罷賞延于嗣又緣淮城壘皆宜興復使烽鼓相達兵食相連若邊民請師皆宜莫許遠夷貢至止於報答語以國家之未暇示以何事而非君湏內教既立徐料寇形辦騎卒四十萬而國中不擾取穀支二十歲而遠邑不驚然後

廣廣文選 卷之十五
越淮窮河跨隴出漠亦何適而不可又教之不敦
一至於今士大夫以下父母在而兄弟異財十
家而七矣庶人父子殊產亦八家而五矣凡甚者
乃危亡不相知饑寒不相卹又嫉謗讒害其間不
可稱數宜明其禁以革其風先有善於家者即務
其賞自今不改則沒其財又三年之喪天下之達
喪以其哀絃索出故制同外興日父均痛故愈遲
齊典漢氏節其臣則可矣薄其子則亂也云何使
哀直之容盡鳴號之音息夫佩玉啟旒深情弗忍

冕珠視朝不亦甚乎凡法有變於古而刻於情則
莫能順焉至乎勞於禮而安於身必遽而奉之何
乃厚於惡薄於善歟今陛下以大孝始基宜反斯
謬且朝享臨御當近自身始妃主典制宜漸加矯
正凡舉天下以奉一君何患不給或帝有集皂之
陋后有帛布之鄙亦無取焉且一體炫金不及百
兩一歲美衣不過數襲而必收寶連櫝集服累笥
目豈常視身未時親是為櫛帶寶笥著衣空敬國
家之財徒奔天下之貨而主以此惰禮妃以此傲

家是何糜嘉之劇惑鄙之甚逮至婢豎皆無定科
一婢之身重婢以使一豎之家列豎以役瓦金皮
繡漿酒藿肉者故不可稱紀至有列駟以遊遨飾
兵以驅叱不亦重甚哉若禁行賜薄不容致此且
細作始并以為儉節而市造華恠即傳於民如此
則遷也非罷也凡天下得治者以實而治天下者
常虛民之耳目既不可誑治之盈耗立亦隨之故
凡厥庶民制度日侈商販之室飾等王侯傭賣之
身製均妃后凡一袖之大足斷為兩一裙之長可

分為二見車馬不辨貴賤視冠服不知尊卑尚方
今造一物小民明已睥睨宮中朝制一衣庶家晚
已裁學侈麗之原實先宮闈又妃主所賜不限高
卑自今以去宜為節目金魄翠玉錦繡縠羅奇色
異章小民既不得服在上亦不得賜若工人復造
奇伎淫器則皆焚之而重其罪又置官者將以燮
天平氣贊地成功防姦御難治煩理劇使官稱事
立人稱官置無空樹散位繁進冗人今高卑異實
大小反稱名之不定是謂官邪而世廢姬公之制

俗傳秦人之法惡明君之典好闇主之事其憎聖
愛愚何其甚矣今則宜先省事從而并官置位以
周典為式變名以適時為用秦漢末制何足取也
當使德厚者位尊位尊者祿重能薄者官卑官賤
者秩輕纓冕綬佩稱官以服車騎容衛當職以施
又寄土州郡宜通廢罷舊地民戶應更置立豈吳
邦而有徐邑揚境而宅充民上淆辰紀下亂畿甸
其地如朱方者不宜置州土如江都者應更建邑
又民少者易理君近者易歸凡吏皆宜每詳其能

每厚其秩為縣不得復用恩家之貧為郡不得復
選勢族之老又王侯識未堪務不應疆仕湏合冠
而啟封能政而議爵且帝子未官人誰謂賤但宜
詳置賓友選擇正人亦何必列長史叅軍別駕從
事然後為貴哉又世有先後業有難易明帝能令
其兒不匹光武之子馬貴人能使其家不比陰后
之族盛矣哉此於後世不可忘也至當輿柳碎首
之忿陛殿延辟戟之威此亦復不可忘也內外之
政實不可雜若妃主為人請官者其人宜終身不

得為官若請罪者亦終身不得赦罪凡天下所須者才而才誠難知也有深居而言寡則蘊學而無由知有卑處而事隔則懷竒而無由進或復見忌於親故或亦遭讒於貴黨其欲致車右而動御席語天下而辯治亂焉可得哉漫言舉賢則斯人固未得矣宜使世之所稱通經達史辨詞精數吏能將材曲技小道者使獵纓危鄰博求其用制內外文武親疎遠近及仕之顛令各以所能而造其室降情以誘之卑身以安之然後察其擢脣吻樹頰

胥動精神發意氣語之所至意之所執不過數四間不亦盡可知哉若忠孝廉清之比疆正惇柔之倫難以檢格立不可湏臾定宜使鄉部求其行守宰察其能竟皆見之於選貴呈之於相主然後處其職宜定其位用如此故應愚鄙盡捐賢明悉舉矣又俗好以毀沈人不知察其所以致毀以譽進人不知測其所以致譽毀徒皆鄙則宜擢其毀者譽黨悉庸則宜退其舉者如此則毀譽不妄善惡分矣又既謂之才則不宜以階級限不應以年齒

齊凡貴者好疑人少不知其少於人矣老者亦輕
人少不知其不及少矣自釋氏流教其來有源淵
檢精測固非深矣舒引容潤既亦廣矣然習慧者
日替其修束誠者月繁其過遂至糜散錦帛侈飾
車從復假粗醫術託雜卜數延姝滿室置酒浹堂
寄夫託妻者不無殺子乞兒者繼有而猶倚靈假
像背親傲君欺費疾老震損宮邑是乃外刑之所
不容戮內教之所不悔罪而橫天地之間莫不糾
察人不得然豈其鬼歟今宜申嚴佛律禪重國令

其疵惡顯著者悉皆罷遣餘則隨其執行各為之
條使禪義經誦人能其一食不過蔬衣不出布若
應更度者則令先習義行本其神心必能草腐人
天竦精以往者雖侯王家子亦不宜拘凡鬼道惑
衆妖巫破俗觸木而言恠者不可數寓采而稱神
者非可美其原本是亂男女合飲食因之而以祈
祝從之而以報請是亂不誅為害未息凡一苑始
立一神初興淫風輒以之而甚今脩隄以北置園
百里峻山以右居靈十房糜財敗俗其可稱限又

針藥之術世寡復脩診脉之伎人鮮能達民因是
益微於鬼遂棄於醫重令耗惑不及死天復半今
大醫宜男女習教在所應遣吏受業如此故當愈
於媚神之愚微正湊理之敝矣凡無世不有言事
永時不有令下然而升平不至昏危是繼何哉蓋
設令之本非實也又病言不出於謀臣事不便於
貴黨輕者抵訾呵駭重者死壓窮擯故西京有反
誹之誅東郡有黨錮之戮陛下若欲申常令循末
典則群臣在焉若欲改舊章興王道則微臣存矣
敢昧死以陳唯陛下察之

與子姪書

雷次宗

夫生之脩短咸有定分定分之外不可以智力求
但當於所稟之中順而勿率耳吾少嬰羸患事鍾
養疾為性好閑志棲物表故雖在童稚之年已懷
遠迹之意暨于弱冠遂託業廬山逮事釋和尚于
時師友淵源務訓弘道外慕等夷內懷排發於是
洗氣神明翫心墳典勉志勤躬夜以繼日爰有山
水之好悟言之勸實足以通理輔性成夫疊疊之

業樂以忘憂不知朝日之晏矣自游道餐風二十
餘載淵匠既傾良朋凋索續以釁逆違天備嘗荼
蓼疇昔誠願頓盡一朝心慮荒散情意來損故遂
與汝曹歸耕壟畔山居谷飲人理義絕日月不處
忽復十年大馬之齒已踰知命崦嵫將迫前途幾
何實遠想尚子五岳之舉近謝居室瑣瑣之勤及
今耄未至昏哀不及頓尚可厲志於所期縱心於
所託棲誠來生之津梁專氣莫年之攝養既歲日
於良辰偷餘樂於將除在心所期盡於此矣汝等

年各成長冠娶已畢脩惜衡泌吾復何憂但願守
全所志以保令終耳自今以往家事大小一勿見
關子平之言可以為法

答范特進書

謝康樂

辱告慰企晚寒體中勝常靈運脚諸疾此春更甚
憂慮故人有情信如來告企詠之結實過饑渴山
澗幽阻音塵濶絕忽見諸讚歎慰良多可謂俗外
之詠尋覽三復味翫增懷輒奉和如別雖詞不足
睹然意寄盡此從弟惠連後進文悟衰宗之美亦

廣廣文選 書卷之五
十一
有一首并以遠呈

與廬陵王義真

謝康樂

會稽既豐山水是以江左嘉遯竝多居之但季世
慕榮幽棲者寡或復才為時求弗獲從志至若王
弘之拂衣歸耕踰歷三紀孔淳之隱約窮岫自始
迄今阮萬齡辭事就閒纂成先業浙河之外棲遲
山澤如斯而已既遠同義唐亦激貪厲競殿下愛
素好古常若布衣每意音聞虛想巖穴若遣一介
有以相存真可謂千載盛美也

與妹書

鮑照

吾自發寒雨而全行日少棧石星飯結荷水宿以
今食時僅及大雷塗登千里日喻一辰去親為客
如何如何向因步頓憑觀川陸遨神清渚流睇方
曠東顧三洲之隔西眺九派之分闕地門之絕景
望天際之孤雲南則積山萬狀爭氣負高含霞飲
景參差代雄陵跨長隴前後相屬帶天有匝橫地
無窮東則砥原遠隰二端靡際寒蓬夕卷古樹雲
平旋風四起思鳥群歸靜聽無聞極視不見北則

陂池潛演湖澤脉通樓風之鳥水化之蟲以智吞
愚因疆捕小號噪驚聒紛物其中西則迴江永指
長波吞合滔滔何窮漫漫安竭左右青藹表裏紫
霄從嶺而西氣盡金光半山以下純為黛色信可
以神居帝郊鎮控湘漢者也夕景欲沉曉露將合
孤鶴寒嘯遊鴻遠吟樵蘇一歎舟子再泫誠足憂
悲不可說也

與崔祖思書

劉善明

昔時之遊于今邈矣或携手春林或負杖秋澗逐
清風於林杪追素月於園垂如何故人徂落殆盡
足下方擁旄北服吾剖竹南甸相去千里間以江
山人生如寄來會何時嘗覽書史數千年來略在
眼中矣歷代參差萬里同異夫龍虎風雲之契亂
極必夷之幾古今豈殊此實一揆日者沈攸之擁
長蛇於外粲秉欽識所祖唯有京鎮創為聖基遂
乃擢吾為首佐授吾以大郡付吾關中委吾畱任
既不辨有抽劔兩城之用橫槊舉旗之能徒以挈
瓶小智名參佐命常恐朝露一下深恩不酬憂深

廣廣文選 書卷之五 十三
責重轉不可據還視生世倍無次緒藿羹布被猶
篤鄙好惡色憎殼暮齡尤甚出蕃不與台輔列入
國不與公卿遊孤立天地之間無猜無託唯知奉
主以忠事親以孝臨民以潔居家以儉足下今鳴
笳舊鄉衣繡故國宋季荼毒之悲已蒙蘇秦河朔
倒懸之苦方須救拔遣遊辯之士為鄉導之使輕
裝啟行經營舊壤今泗上歸業稷下還風君欲誰
讓聊送諸心敬申貧贈

與王儉書

張克

吳國男子張克致書於琅琊王君候侍者頃日路
長愁霖韜晦涼暑未平想無虧攝克幸以魚釣之
閑鑣採之暇時復以卷軸自娛逍遙前史從橫萬
古動默之路多端紛綸百年昇降之徒不一故以
圓行方止器之異也金剛水柔性之別也善御性
者不違金石之質善為器者不易方圓之用所以
北海掛簪帶之高河南降璽書之貴克生平少偶
不以利欲干懷三十六年差得以棲貧自澹介然
之志峭聳霜崖確乎之情峰橫海岸影纓天閣既

廣文選 書卷之五 十一
謝郎廟之華綴組雲臺終慙衣冠之秀所以擯跡
江臯陽狂隴畔者寔由氣岸疏凝情塗狷隔獨師
懷抱不見許於俗人孤秀神崖每遭回於在世故
君山直上蹙壓於當年叔陽曼舉鞦韆乎千載充
所以長群魚鳥畢影松阿半頃之田足以輸稅五
畝之宅樹以桑麻嘯歌於川澤之間諷味於澗池
之上泛濫於漁父之游偃息於卜居之下如此而
已克何識焉若夫驚巖罩日壯海逢天竦石崩尋
分危落仞桂蘭綺靡叢雜於山幽松柏森陰相繚

於澗曲元卿於是乎不歸伯休亦以茲長往若迺
飛竿釣渚濯足滄洲獨浪烟霞高卧風月悠悠琴
酒岫遠誰來灼灼文談空罷方寸不覺鬱然千里
路阻江川每至西風何嘗不眷聊因疾隙略舉諸
襟持此片言輕枉高聽丈人歲路未疆學優而仕
道佐蒼生功橫海望入朝則協長倩之誠出儀則
抗仲子之節可謂盛德維時孤松獨秀者也素履
未詳斯旅尚耿茂陵之彥望冠蓋而長懷霸山之
氓佇衣車而聳歎得無惜乎若鳴裝撰御鶴駕軒

廣廣文選 卷之十五
空則岸木辭枯山被其潤竒禽異羽或巖際而逢
迎弱霧輕烟乍林端而菴藹東都不足竒南山豈
為貴克昆西之百姓岱表之一人蠶蠶而衣耕且食
不能事王侯覓知己造時人騁遊說逢轉於屠博
之間其歡甚矣夫人早遇知己躬逢崇禮肆上之
眷望溢於早晨卿下之言談合於造次然舉世
皆謂克為狂克亦何能與諸君道之哉是以披聞
見掃心胸述平生論語默所以通夢交魂推襟送
抱者其惟丈人而已關山憂阻書罷莫因僮遇樵

者妄塵執事

與何點書勸令菜食

周顒

丈人之所以未極遐蹈或在近全菜邪脫灑離
析之計鼎俎網罟之興載策其來寔遠誰敢干議
觀聖人之設膳脩仍復為之品節蓋以茹毛飲血
與生民共始縱而勿裁將無厓畔善為士者豈不
以恕已為懷是以各靜封疆罔相陵軼况乃變之
大者莫過死生之所重無踰性命性命之於彼
極切滋味之在我可賒而終身朝晡資之以永彼

就冤殘莫能自列我業久長吁哉可畏且區區微
如跪薄易矜歎彼弱魔顧步宜愍觀其飲啄飛沈
使人物憐悼况可心心撲禡加復恣忍吞嚼至乃
野牧盛群閉豢重圈量肉揣毛以挨枝剝如土委
地僉謂常理百為愴息事豈塗若云三世理誣則
幸矣良快如使此道果然而形未息則一往一來
一生一死循環常事雜報如家人天如客遇客
日歎在家日多吾儕信業未足長免則傷心之慘
行亦息念丈人於血氣之類雖無身踐至於晨鳧

夜鯉不能不取備屠門財貝之經盜手猶為廉士
所棄生性之一啓鸞刀寧復慈心所忍騶虞雖饑
非自死之草不食聞其風豈不使人多愧衆生之
稟此形質以畜肌骨皆由其積壅癡迷沈流莫反
報受穢濁歷苦酸長此其與肥皆無明之報聚也
何至復引此滋腴自汗腸胃丈人得此有素聊復
寸言發起耳

移虜廣陵侯書

張欣泰

聞攻鍾離是子之深策可無謬哉兵法云城有所

不攻地有所不爭豈不聞之乎我國家舟舸百萬
覆江橫海所以索甲于今不至欲以邊城疲魏士
卒我且千里運糧行雷俱弊一時霖雨川谷酒溢
然後乘帆渡海百萬齊進子復奚以御之乃令魏
主以萬乘之重攻此小城是何謂歟攻而不拔誰
之耻邪假令能拔子守之我將連舟千里舳艫相
屬西過壽陽東接滄海仗不再請糧不更取士卒
偃臥起而接戰乃魚鱉不通飛鳥斷絕偏師淮左
其不能守較可知矣如其不拔吾將假法于魏之

有司以請子之過若挫兵夷衆攻不卒下驅士填
隍拔而不能守則魏朝名士其當別有深致乎吾
所未能量昔魏之大武佛狸傾一國之衆攻十雉
之城死亡大半僅以身返既智屈於金墉亦雖拔
而不守皆笑失所為至今為笑前鑒未遠已恐之
乎和門邑戲載徃意

與尚書令袁粲書

丘巨源

民信理推心闇於量事庶謂丹誠感達賞報孱期
豈虞寂寥忽焉三稔議者必云筆記賤伎非殺活

所待開勸小說非否判所寄然則先聲後實軍國
舊章七德九功將名當世仰觀天緯則右將而左
相俯察人序則西武而東文固非胥祝之倫伍巫
匠之流匹矣去昔竒兵變起呼吸雖凶渠即剿而
人情更迷茅恬開城千齡出叛當此之時心膂胡
越奉迎新亭者士庶填路投名朱雀者愚智空闔
人域而民不域人畏而民不畏其一可論也臨機
新亭獨能抽刃斬賊者唯有張敬兒而中書省獨
能奮筆弗顧者唯有丘巨源文武相方誠有優劣

就其死亡以決成敗當崩天之敵就不測之禍請
問海內此膽何如其二可論也又爾時顛沛普喚
文士黃門中書靡不畢集擄翰振藻非為乏人朝
廷洪筆何故假手凡賤若以此賊彊盛勝負難測
群賢怯不染豪者則民宜以勇獲賞若云羽檄之
難必須筆傑群賢推能見委者則民宜以才賜列
其三可論也竊見桂陽賊賞不赦之條凡二十五
人而李恒鍾爽同在此例戰敗後出罪竝釋然而
吳邁遠族誅之罰則操筆大禍而操戈無害論以

廣廣文選 卷之三
賞科則武人超越而文人埋沒其四可論也且邁
遠置辭無乃侵慢民作符檄肆言詈辱放筆出手
即就壘粉若使桂陽得志民若不輟裂軍門則應
署斬都市嬰孩脯膾伊可熟念其五可論也往年
戎旅萬有餘甲十分之中九分冗隸可謂衆矣攀
龍附麟翻焉雲翔至若民狂夫可謂寡矣徒關敕
旨空然泥沈詎其荷駭歷末皆是白起操牘事始
允非魯連邪民偵國算迅足馳烽旆之機帝擇逸
翰赴尉羅之會既能陵敵不殿爭先無負宜其微

賜存在少沾飲齧遂乃棄之蒲間如蜉如蟻擲之
言外如土如灰絙隸帖戰無拳無勇並隨資峻級
矣凡豫臺內不文不武已坐拱清階矣撫骸如此
瞻例如彼既非草木何能弭殼

與陽休之書

祖鴻勳

與陽休之書曰陽生大弟吾比以家貧親老時還
故郡在本縣之西界有雕山焉其處間遠水石清
麗高巖四匝良田數頃家先有野舍於斯而遭亂
荒廢今復經始即石成基憑林起棟蘿生映宇泉

唐唐文選
書卷之三
流遠階月松風草緣庭綺合日華雲實傍沼星羅
簷下流烟共霄氣而舒卷園中桃李雜椿栢而葱
僭時一褰裳涉澗負杖登峰心悠悠以孤上身飄
飄而將逝杳然不復自知在天地間矣若此者久
之乃還所住孤坐危石撫琴對水獨詠山阿舉酒
望月聽風轂以興思聞鶴唳以動懷企莊生之道
遙慕尚子之清曠首戴陶浦身衣緇襜出藝梁稻
歸奉慈親緩步當車無事為貴斯已適矣豈必撫
塵哉而吾生既繫名轂之韁鑣就良工之剖剝振

佩紫臺之上鼓袖丹墀之下補金匱之漏
簡訪玉山之遺文散精神於丘壑盡心力
於河漢榜藻期之擊繡發議次在芬香茲
自美耳吾無取焉嘗試論之夫崑峰積玉
光澤者前毀瑤山叢桂芳茂者先折是以
東都有珪冕之臣南國見捐情之士斯豈
惡梁錦好疏布哉蓋欲保其七尺終其百
年耳今弟官位既達聲華已遠象由齒斃

膏用明煎既覽老氏谷神之談應體留侯
止足之逸若能翻然清尚解佩捐簪則吾
於茲山莊可辨一得把臂入林挂巾垂杖
攜酒登巖舒席平山道素志論舊款訪冊
法語玄書斯亦樂矣何必富貴乎去矣陽
子途乖趣別緬尋此旨杳若天漢已矣哉
書不盡意

答張讚謝示集書

簡文帝

卿少好文章於二十五年矣竊嘗論之日
月三辰火龍黼黻尚且著於玄象軟乎人
事而况文辭可止謳謔可輟乎不為壯夫
楊雄實小言而破道非謂君子曹植亦小
辯破言論之科刑罪在不赦至如春庭落
景轉蕙承風秋雨朝暗簷梧秋下浮雲生
野明月入樓時命親賓乍動嚴駕埤璅屢
酌鸚鵡驟傾伊昔三邊久番四戰胡霧連

廣雅文選 書卷之五 二
天征旗拂日時聞塢笛遙聽塞笳或鄉思慘然
或雄心慎薄是以沉吟短翰衲綴庸音寓目寫
心因事而作

與湘東書

梁太子

吾輩亦無所遊賞止事披閱性既好文時復短詠
雖是庸音不能閣筆有慙伎癢更同故態比見京
師文體儒鈿殊常競學浮疎爭為闡緩玄冬脩夜
思所不得既殊比興正肯風騷若夫六典三禮所

施用有地吉凶嘉賓用之則有所未聞吟詠情性
反擬內則之篇操筆寫志更摹酒誥之作遲遲春
日翻學歸藏湛湛江水遂同大傳吾既拙於為文
不敢輕有倚擬但以當世之作歷方古之才人遠
則楊馬曹王近則潘陸顏謝而觀其遣辭用心了
不相似若以今文為是則古文為非若昔賢可稱
則今體宜弃俱為盍各則未之敢許又時有效謝
康樂裴鴻臚文者亦頗有感焉何者謝客吐言天
技出於自然時有不拘是其糟粕裴氏乃是良史

之才了無篇什之美是為學謝則不屆其精華但
得其冗長師裴則茂絕其所短謝故巧不可階裴
亦質不宜慕故胸馳臆斷之侶好名忘實之類方
分肉於仁馱逞卻克於邯鄲入鮑忘臭効尤致禍
決羽謝生豈三千之可及伏膺裴氏懼兩唐之不
傳故玉徽金銑反為拙目所嗤巴人下里更合郢
中之聽陽春高而不和妙聲絕而不尋竟不精討
錙銖覈量文質有異巧心終愧妍手是以握瑜懷
玉之士瞻鄭邦而知退章甫翠履之人望閩鄉而

歎息詩既若此筆又如之徒以煙墨不言受其驅
染紙札無情任其搖襞甚矣哉文之橫流一至於
此至如近世謝眺沈約之詩任昉陸倕之筆哲人
才子之冠冕述作之摺模張士簡之賦周升逸之
端赤城佳手難可復遇文章未墜必有英絕領袖
之主非弟其誰每欲論之無可與語吾子建一共
商摧辯茲清濁使如涇渭論茲月旦類彼汝南朱
丹既定雌黃有別使夫懷鼠知慙濫竿自耻譬斯
衣紹畏見子將同彼盜牛遙羞王烈相思不見我

勞如何

答湘東王書

謝幾卿

下官自奉違南浦卷迹東郊望日臨風瞻言佇立
仰尋惠渥陪奉遊宴漾桂棹於清池席落英於曾
咀蘭香蕪御羽觴競集側聽餘論沐浴玄流濤波
之辯懸河不足譬春藻之辭麗文無以匹莫不相
顧動容服心勝口不覺春日為遙更謂修夜為促
嘉會難常搏雲易遠言念如昨忽焉素秋恩光不
遺善謔遠降因事罷歸豈云棲畝匪商官市理就

一塵田家作苦實符清誨本乏金羈之飾無假玉
璧為資徒以老使形踈疾令心阻沈滯牀簟彌歷
七旬夢幻俄頃憂傷在念竟知無益思自祛遣尋
理滌意即以任命為膏酥擘鏡照形翻以支離代
萱樹故得仰慕徽猷永言前哲鬼谷深棲接輿高
舉遯名屠肆發迹闕市其人緬邈餘流可想若令
亡者有知寧不縈悲玄壤恨隔芳塵如其逝者可
作必當昭被光景懽同遊豫使夫一介老圃得造
虛心末席去日已踈來侍未屏連劔飛鳥擬非其

類懷私茂德竊用涕零

與劉孝綽書

湘東王

君屏居多暇差得肆意典墳吟詠情性比復希數
古人不以委約而能不伎癢且虞卿史遷由斯而
作想擣屬之興益當不少洛地紙貴京師名動彼
此一時何其盛也近在道務閑微得點翰雖無紀
行之作頗有懷舊之篇至此已來衆諸屑役小生
之詆恐取辱於廬江遮道之姦慮興謀於從事方
且褰帷自厲求莫不休筆墨之功曾何暇豫至於

心乎愛矣未嘗有歇思樂惠音清風靡聞譬夫夢
想溫玉饑渴明珠雖愧下隨猶為好事新有所製
想能示之勿等清慮徒虛其情無由賞悉遣此代
懷數路計行遲還芳札

答湘東王書

劉孝綽

伏承自辭皇邑爰至荆臺未勞刺舉且擣高麗近
雖預觀尺錦而不覩全玉昔臨淄詞賦悉與揚脩
未殫寶笥顧慙先哲渚宮舊俗朝衣多故李固之
薦二邦徐珍之奏七邑威懷之道兼而有之當欲

唐廣文選 卷之五
便金石流芳耻用翰墨垂迹雖乖知二偶達聖心
爰自退居素里却掃窮閑比楊倫之不出譬張摯
之杜門昔鄭卿窮愁肆言得失漢臣鬱志廣叙盛
衰彼此一時擬非其匹竊以文豹何辜以文為罪
由此而談又何容易故韜翰吮墨多歷寒暑既闕
子幼南山之哥又微故通渭水之賦無以自同獻
笑少酬褒誘且才乖體物不擬作於玄根事殊宿
諾寧貽懼於朱亥顧已反躬載懷累息但瞻言漢
廣邈若天涯區區一心分宵九逝殿下降情白屋

存問相尋食棊懷音矧伊人矣

與何敬容書

謝 郁

草萊之人聞諸道路君侯已得瞻望多士出入禁
門醉尉將不敢呵灰然不無其漸甚休甚休敢賀
於前又將弔也昔流言裁作公旦東奔燕書始來
子孟不入夫聖賢被虛過以自斥未有嬰時釁而
求親者也且曝鯁之鱗不念杯杓之水雲霄之翼
豈顧籠樊之糧何者所託已盛也昔君侯納言加
首鳴玉在要回豐貂以步文昌聳高蟬而趨武帳

唐書文選 卷之五
可謂盛矣不以此時薦才拔士少報皇主之恩今
卒如爰絲之說受責見過方復欲更窺朝廷觖望
萬分竊不為左右取也昔竇嬰楊惲亦得罪明時
不能謝絕賓客獨交黨援卒無後福終光前禍僕
之所弔實在於斯斯人所以頗猶有踵君侯之門
者未必皆感惠懷仁有灌夫任安之義乃戒翟公
之大畧冀君侯之復用也夫在思過之日而挾復
用之意未有為智者說矣君侯宜杜門念失無有
所通築茅茨於鍾阜聊優游以卒歲見可憐之意

著待終之情復仲尼能改之言惟子貢更也之譬
少戢言於衆口微自救於竹帛所謂失之東隅收
之桑榆如此令明主聞知尚有冀也僕東臯鄙人
入冗幸無衝窶耻天下之士不為執事道之故披
肝膽示情素君侯豈能鑒焉

與舉法師書

劉峻

聞諸行李高談微德逖聽風聲心飛魂竦無異斬
仙之望石髓太陰之思龍燭蒼星昏昊涼雲送秋
道勝則肥固應願攝衣裳虹蜺帷幕霄露餌黃菊

之落葉酌清澗之悲流旦候歸鴈晨見暮聽羈雌
獨鶴神影影爾蓋象蕭史之騎鳴鳳列子之御長
風雖荆卿旁若無人孝言堅卧冰雪沈沈隱隱何
以尚之哉至於馳驚經囿翱翔書圃極龍宮之妙
典彈石室之鴻記道生伏其天真曼倩謝其辨物
若乃習是童子措志雕蟲藻思內流英華外發歲
隄秋竹照耀春松爵頌息明珠之譽長門濫黃金
之賞盛矣美矣煥其麗乎昔旅浙河嘗觀組績不
覺紙蕪筆焚魂魄斯盡自茲厥後兩絕珪璧意瞻

瞻於菁華腸迴迴於九逝夫日御亭照不踰隙穴
海若瀆涌莫限隈嶠以玉抵鵲幸傳餘寶冀閱清
徽用瘳眩疾然越民非鬻冠之所齊國豈奏韶之
地望與其進無貽責焉

與沈約論宮商書

陸厥

范詹事自序性別宮商識清濁特能適輕重濟艱
難古今文人多不全了斯處縱有會此者不久從
根本中來沈尚書亦云自靈均以來此秘未觀或
闇與理合匪由思至張蔡曹王曾無先覺潘陸顏

謝去之彌遠大旨鈞使宮羽相變低昂奸節若前有浮聲則後須切響一簡之內音韻盡殊兩句之中輕重悉異辭既善矣理又善焉但觀歷代衆賢似大都闇此處而云此秘未覩近於誣乎案范云不從根本中來尚書云匪由斯至斯可謂揣情謬於玄黃槩句善其音律也范又云時有會此者尚書云或闇與理合則美詠清謳有辭章調韻者雖有差謬亦有會合推此以往可得而言夫思有合離前哲同所不免文有開塞即事不得無之子建

所以好人譏彈士衡所以遺恨終篇既曰遺恨非盡美之作理可詆訶君子執其詆訶便謂合理為闇豈如指其合理而寄詆訶為遺恨邪自魏文屬論深以清濁為言劉植奏書大明體勢之致岨培妥帖之談操末續顛之說興玄黃於律呂比五色之相宣苟此秘未覩茲論為何所指邪故愚謂前英已早識宮徵但未屈曲指的若今論所申至於掩瑕藏疾合少謬多則臨淄所云人之著述不能無病者也非知之而不改謂不改則不知斯曹陸

又稱竭情多悔不可力彊者今許以有病有悔為言則必自知無悔無病之地引其不了不合為閤何獨誣其一合一了之明乎意者亦質文時異古今好殊將急在情物而緩於章句情物文之所急美惡猶且相半章句意之所緩故合少而謬多義兼於斯必非不知明矣長門上林殆非一家之賦洛神池鴈便成二體之作孟堅精正詠史無虧於東主平子恢富羽獵不累於憑虛王粲初征他文未能稱是楊脩敏捷暑賦彌日不獻率意寡尤則

事促乎一日翳翳愈伏而理賒於七步一人之思遲速天懸一家之文工拙壤隔何獨官商律呂必責其如一邪論者乃可言未窮其致不得言曾無先覺也

報王筠書

沈約

覽示詩實為麗則聲和被紙光影盈字變牙接響顧有餘慙孔翠群翔豈不多愧下情拙目每佇新奇爛然總至權輿已盡會昌昭發蘭揮玉服克諧之義寧比笙簧思力所該一至于此嘆服嗟研周

廣唐文選 卷之五
流戀念昔時幼壯頗愛斯文含咀之間倏焉疲暮
不及後進誠非一人擅美推能寔歸吾子遲比間
日清覲乃申

答陸厥書

沈約

宮商之聲有五文字之別累萬以累萬之繁配五
聲之約高下低昂非思力所舉又非止若斯而已
也十字之文顛倒相配字不過十巧歷已不能盡
何況復過於此者乎靈均以來未經用之於懷抱
固無從得其髣髴矣若斯之妙而聖人不尚耶此

蓋曲折聲韻之巧無當於訓義非聖哲立言之所
急也是以子雲譬之雕蟲篆刻云壯夫不為自古
辭人豈不知宮羽之殊商徵之別雖知五音之異
而其中參差變動所昧實多故鄙意所謂志祕未
覩者也以此而推則知前世文士便未悟此處若
以文章之音韻同弦管之聲曲則美惡妍蚩不得
頌相乖反譬猶子野操曲安得忽有闡緩失調之
聲以洛神比陳思他賦有似異乎之作故知天機
啟則律呂自調六情滯則音律頓舛也士衡雖云

炳若緝錦寧有濯色江波其中復有一片是衛文
之服此則陸生之言即復不盡者矣韻與不韻復
有精麤輪扁不能言老夫亦不盡辨此

沈麟士書

沈約

獨往之業雖聞前載高塵逸軌罕或共時未嘗不
拊袂興懷望古遐矚尊賢拔俗遙然沉冥自遠幽
貞之操義高篆策雖將詡不窺城市鄭真名動京
師何遠之有名山旣鄉內所豐清川又坐卧可對
不出戶庭而與禽尚齊美哉約少不自涯早愛蟲

鳥逐食推遷未諧夙願冀幽期可託克全素履弋
釣泉臯以慰間暮則生平之心於此遂矣

答劉沓所贈齋閣讚書

沈約

生平愛嗜不在人中林壑之懽多與事奪日暮塗
殫此心住矣猶復少存閑遠徵懷清曠結宇東郊
匪云止息政復頗寄夙心時得休偃仲長遊居之
地休連所述之美望慕空深何可髣髴君愛素情
多惠以二贊辭采妍富事義畢舉句韻之間光影
相照便覺此地自然十倍故知麗辭之益其事弘

多輒當置之閣上坐卧嗟覽別卷諸篇並為名製
又山寺既為警策諸賢從時復高竒解願愈疾義
無乎此遂比敘會更共申析

北使還與永豐侯書

劉孝儀

足踐寒地身犯朔風暮宿客亭晨灼謁舍飄飄辛
苦迄屆羶鄉雜種覃茲頗慕中國兵傳李緒之法
樓擬衛律所治而毳幙難淹酪漿易饜王程有限
時及玉關射鹿胡奴乃共歸國刻龍漢節還持入
塞馬銜首啗嘶立故墟人獲蒲萄婦種舊里稚子
出迎善隣相勞倦握蟹螯亟覆蝦碗未改朱顏略
多自醉用此終日亦以自娛

為庾杲之與劉居士蚪書

任昉

自別荆南迄將二紀杲之牽滯形有推遷物保文
人沒志外身超然獨善雖心路咫尺而事阻山河
悠悠白雲依然有道金涼佇運想恒納宜冲明在
襟履候無爽體道為用蹈理則和杲之牽綴疲朽
愧心已多訪德則山林宵然觀道則風雲自遠歲
暮之期指塗衡岳神虛氣懋無待怡和江湖相望

廣廣文選 卷之五
安事行李司徒竟陵王懋於神者言象所絕接乎
士者遐邇所宗鍾石非禮樂之本纓緇豈朝野之
謂想閻投之懷不以形體為阻一日通籍梁邸親
奉話言夢想清塵為歲已積以大人非羔鴈所榮
故息蒲弊之典勝竒真運諒有風期之遲君王卜
居郊郭縈帶川阜顯不絢功晦不標迹從容乎人
野之間以窮二者之致且弘護為心廣孚真俗思
聞繫表共剖衆心妙域遙山河虛館帶川浹實望
賁然少酬側遲昔東平樂善旌君大於東閣今王

愛素致吾子於西山豈不盛歟百齡飄驟凝滯自
物千載一朝為仁由已且凌雪戒塗非滅迹之郊
鴻鍾在御豈銷聲之道已標異人之迹故有同物
之勞夫山水無情應之以會愛閑在我觸目蕭條
衡岳何親鍾嶺何薄想弘思有在不俟繁言

與梁處士汝南周弘讓書

王褒

嗣宗窮途楊朱岐路征蓬長逝流水不歸舒慘殊
方炎涼異節木皮春厚桂樹冬榮想攝衛惟宜動
靜多豫賢兄入關敬承款曲猶依杜陵之水尚保

池陽之田鏹迹幽谿銷聲穹谷何期愉樂幸甚幸甚弟昔因多疾亟覽九仙之方晚涉世途常懷五嶽之舉同夫闕令物包異人譬彼客卿服膺高士上經說道屢聽玄牝之談中藥養神每稟丹沙之說頃年事導盡容髮衰謝共其黃矣零落無時還念生涯繁憂摠集視陰愒日猶趙孟之徂年負杖行吟同劉琨之積慘河陽北臨空思鞏縣霸陵南望還見長安所冀書生之魂來依舊壤射聲之鬼無恨他鄉白雲在天長離別矣會見之期邈無日

矣援筆攬紙龍鍾橫集

復王褒書

周弘讓

甚矣悲哉此之為別也雲飛泥沈金鑠蘭滅玉音不嗣瑤華莫因家兄至自鎬京致書於穹谷故人

之跡有如對面開題申紙流臉沾膝江南燠熱橘柚冬青渭北沍寒楊榆晚葉土風氣候各集所安餐衛適時寢興多福甚善甚善與弟分袂西陝言反東區雖保周陵還依蔣徑三姜離枿二仲不歸麋鹿為曹更多悲緒丹經在握貧病莫諧芝朮可

求恒為採掇昔吾壯日及弟當年俱值邕熙並歡
衡泌南風雅操清商妙曲絃琴促坐無乏名晨王
瀝金華冀獲難老不虞一旦翻覆波瀾吾已惴陰
弟非茂齒禽尚之契各在天涯永念生平難為胸
臆且當視陰數箭排愁破涕人生樂耳憂戚何為
豈能遽悲次房遊魂不反遠棄家產骸柩無託但
願愛玉體珍金箱保期頤享黃髮猶冀蒼鷹頰鯉
時傳尺素清風朗月俱寄相思子淵子淵長為別
矣握管操觚聲淚俱咽

答陳高祖書

蔡景歷

蒙降札書曲垂引逮伏覽循回載深欣暢竊以世
求名駿行地能致千里時愛竒寶照車遂有徑寸
但雲咸斯奏自輟巴渝杞梓方雕豈盼栲櫨仰惟
明將軍使君侯節下英才挺茂雄姿秀拔運屬時
艱志匡多難振衡嶽而綏五嶺滌瀨源而澄九派
帶甲十萬強弩數千誓勤王之師總義夫之力鯨
鯢式剪役不踰時氛霧廓清士無血刃雖漢誅祿
產舉朝寔賴絳侯晉討約峻中外一資陶牧比事

廣文選 卷之十五
論功彼奚足美加以抗威充服冠蓋通於北門整
飾徐方詠歌溢於東道能使邊亭卧鼓行旅露宿
巷不拾遺市無異價洋洋乎功德政化曠古未儔
諒非膚淺所能殫述是以天下之人向風慕義接
踵披衿雜遝而至矣或帝室英賢貴游令望齊楚
秀異荆吳岐嶷武夫則猛氣紛紜雄心四據陸拔
山岳水斷虬龍六鈞之弓左右馳射萬人之劔短
兵交接攻壘若文鴛焚艦如黃蓋百戰百勝貔貅
為群文人則通儒博識英才偉器雕麗暉煥摛揆

絢藻子雲不能抗其筆元瑜無以高其記尺翰馳
而聊城下清談奮而羸軍却復有三河辯客改哀
樂於須臾六奇謀士斷變反於倏忽治民如子賤
踐境有成折獄如仲由片辭從理直言如毛遂能
厲主威銜使若相如不辱君命懷忠抱義感恩狗
已誠斷黃金精貫白日海內雄賢牢籠斯備明將
軍徹鞍下馬推案止食申爵以榮之築館以安之
輕財重義卑躬厚士盛矣哉盛矣哉抑又聞之戰
國將相咸推引賓遊中代岳牧竝盛延僚友濟濟

廣文選 卷之五
多士所以成將軍之貴但量能校實稱才任使負
行方止各盡其宜受委責成誰不畢力至如走賤
妄庸人耳秋冬讀書終慙專學刀筆為吏竟闕異
等衡門衰素無所聞達薄官輕資焉能遠人自陽
九邁屯天步艱阻同彼貴仕溺於巨寇函隣危殆
備踐薄冰今王道中興慙憂啟運獲存微命足為
幸甚方歡飲喙是謂來蘇然皇壑未反宛洛魚曠
四壁固三軍之餘長夏無半菽之產遨遊故人聊
為借貸屬此樂土洵美忘歸竊服高義暫謁門下

明將軍降以顏色二三士友假其餘論管削不棄
折簡賜番欲以雞鶩廁鴛鴻於池沼將移瓦礫參
金碧之聲價昔折脅遊秦忽逢眇採檐簷入趙便
致番連今雖羈旅方之非匹樊林之賁何用克堪
但眇眇織蘿憑喬松以自聳蠢蠢輕蚋託驂尾而
遠鷺竊不自涯願備下走且為腹背之毛脫充鳴
吠之數增榮改觀為幸已多海不厭深山不讓高
敢布心腹惟將軍覽焉

極諫陳寶應書

虞寄

時陳寶應結婚雷異潛有逆謀寄乃因書極諫曰
東山虞寄致書於明將軍使君節下寄流離世故
飄寓貴鄉將軍待以上賓之禮申以國士之眷意
氣所感何日忘之而寄沈痼彌雷惕陰將盡常恐
卒填溝壑消塵莫報是以敢布腹心冒陳丹款願
將軍雷須臾之慮少思察之則瞋目之日所懷畢
矣夫安危之兆禍福之機匪獨天時亦由人事失
之毫釐差以千里是以明智之士據重位而不傾
執大節而不失豈惑於浮辭哉將軍文武兼資英

威不世往因多難杖劍興師援旗誓衆抗威千里
豈不以四郊多壘共謀王室匡時報主寧國庇民
乎此所以五尺童子皆願荷戟而隨將軍者也及
高祖武皇肇基草昧初濟艱難于時天下沸騰民
無定主豺狼當道鯨鯢橫擊海內業業未知所從
將軍運動微之鑿折從衡之辯策名委質自託宗
盟此將軍妙美遠圖發於衷誠者也及主上繼業
欽明睿聖選賢與能群臣輯睦結將軍以維城之
重崇將軍以裂土之封豈非宏謨廟略推赤心於

廣曆文選 書卷之十五 四二
物也屢申明詔款篤殷勤君臣之分定矣骨肉之
恩深矣不意將軍惑於邪說遽生異計寄所以疾
首痛心泣盡繼之以血萬全之策竊為將軍惜之
寄雖疾侵耄及言無足採千慮一得請陳愚策願
將軍少戢雷霆賒其剝刻使得盡狂瞽之說披肝
膽之誠則雖死之日猶生之年也自天厭梁德多
難薦臻寰宇分崩英雄互起不可勝紀人人自以為
得之然夷凶翦亂拯溺扶危四海樂推三靈眷命
揖讓而居南面者陳氏也豈非歷數有在惟天所

授當壁應運其事甚明一也主上承基明德遠被
天綱再張地維重紐夫以王琳之強侯瑱之力進
足以搖蕩中原爭衡天下退足以崛強江外雄長
偏隅然或命一旅之師或資一士之說琳則左解
冰泮投身異域瑱則厥角稽顙委命闕廷斯又天
假之威而除其患其事甚明二也今將軍以藩戚
之重東南之衆盡忠奉上戮力勤王豈不勳高竇
融寵過吳芮析珪判野南面稱孤其事甚明三也
且聖朝棄瑕忘過寬厚得人改過自新咸加叙擢

廣廣文選 書卷之五
至於余孝頃潘純陶李孝欽歐陽頎等悉委以心
腹任以爪牙胸中豁然曾無纖芥况將軍疊非張
繡罪異畢謀當何慮於危亡何失於富貴此又其
事甚明四也方今周齊隣睦境外無虞并兵一向
匪朝伊夕非劉項競逐之機楚趙連從之勢何得
雍容高拱坐論西伯其事甚明五也且番將軍狼
顧一隅亟經摧衄聲實虧喪膽氣哀沮高瓌向文
政番瑜黃子玉此數人者將軍所知首鼠兩端唯
利是視其餘將帥亦可見矣孰能被堅執銳長驅

深入繫馬埋輪奮不顧命以先士卒者乎此又其
事甚明六也且將軍之疆孰如侯景將軍之衆孰
如王琳武王滅侯景於前今上摧王琳於後此乃
天時非復人力且兵革已後民皆厭亂其孰能棄
墳墓捐妻子出萬死不顧之計從將軍於白刃之
間乎此又其事甚明七也歷觀前古鑒之往事子
陽季孟傾覆相尋餘善右渠危亡繼及天命可畏
山川難恃况將軍欲以數郡之地當天下之兵以
諸侯之資拒天子之命強弱逆順可得侔乎此又

其事甚明八也且非我族類其心必異不愛其親
豈能及物番將軍身縻國爵子尚王姬猶且棄天
屬而弗顧背明君而孤立危急之日豈能同憂共
患不背將軍者乎至於師老力屈懼誅利賞必有
韓智晉陽之謀張陳井陘之勢此又其事甚明九
也且北軍萬里遠鬪鋒不可當將軍自戰其地人
多顧後梁安背向為心脩旰匹夫之力衆寡不敵
將帥不侔師以無名而出事以無機而動以此稱
兵未知其利夫以漢朝吳楚晉室顛顛連城數十

長戟百萬拔本塞源自圖家國其有成功者乎此
又其事甚明十也為將軍計者莫若不遠而復絕
親番氏秦即快即隨遣入質釋甲偃兵一遵詔旨
且朝廷許以鐵券之要申以白馬之盟朕弗食言
誓之宗社寄聞明者鑒未形智者不再計此成敗
之效將軍勿疑言凶之幾間不容髮方今藩維尚
少皇子幼冲凡預宗枝皆蒙寵樹况以將軍之地
將軍之才將軍之名將軍之勢而能克脩藩服北
面稱臣寧與劉澤同年而語其功業哉豈不身與

廣文選 卷之五
山河等安名與金石相弊願加三思慮之無忽寄
氣力綿微餘陰無幾感恩懷德不覺狂言鈇鉞之
誅其之如薺

與江總書

皇太子

管記陸瑜奄然殂化悲傷悼惜此情何已吾生平
愛好卿等所悉自以學涉儒雅不逮古人欽賢慕
士是情尤篤梁室亂離天下糜沸書史殘缺禮樂
崩淪晚生後學匪無牆面卓爾出群斯人而已吾
識覽雖局未曾以言議假人至於片善小才特用

嗟賞况復洪識奇士此故忘言之地論其博綜子
史諳究儒墨經耳無遺觸目成誦一褒一貶一激
一揚語玄析理披文摘句未嘗不聞者心伏聽者
解頤會意相得自以為布衣之賞吾監撫之暇事
隙之辰頗用談笑娛情琴樽間作雅篇豔什迭互
鋒起每清風明月美景良辰對群山之參差望巨
波之澆瀆或翫新荅時觀落葉既聽春鳥又聆秋
鴈未嘗不促膝舉觴連情發藻且代琢磨間以嘲
譁俱怡耳目並留情致自謂百年為速朝露可傷

豈謂玉折蘭推遽從短運為悲為恨當復何言遺迹餘父觸目增泫絕絃投筆怕有酸恨以卿同志聊復叙懷涕之無從言不寫意

與楊遵彥書

徐陵

夫一言所感凝暉照於魯陽一志冥通飛泉涌於疏勒况元首康哉股肱良哉鄰國相聞風教相期者也天道窮剝鍾亂本朝情計馳惶公私鯁懼而骸骨之請徒淹歲寒顛沛之祈空盈卷軸是所不圖也非所仰望也執事不聞之乎昔分鼉命鷹之

世觀河拜洛之年則有日烏流災風禽騁暴天傾西北地闕東南盛旱坼三川長波含五嶽我大梁應金圖而有亢纂玉鏡而猶屯何則聖人不能為時斯固窮通之恒理也至如荊州刺史湘東王機神之本無寄名言陶鑄之餘猶為堯舜雖復六代之舞陳於總章九州之歌登於司樂虞瓊拊石晉曠調鍾未足頌此英聲無以宣其盛德者也若使郊裡楚翼寧非祀夏之君戡定艱難便是庄周之霸豈徒豳王徙雍基月為都姚帝遷河周年成邑

方今越裳藐藐馴雉北飛蕭脊茫茫風牛南偃吾
君之子舍識知歸而答旨云何所投身斯其未喻
一也又晉熙等郡皆入貴朝去我尋陽經塗何幾
至於鐺鐺曉漏的的霄烽隔淑浦而相聞臨高臺
而可望泉流寶盃遙憶湓城峰號香爐依然廬嶽
日者鄱陽嗣王治兵匯派屯戍淪波朝夕牋書春
秋方物吾無從以躡屩彼何路而齊鑣豈其然乎
斯不然矣又近者邵陵王通和此國郢中上客雲
聚魏都鄴下名卿風馳江浦豈廬龍之徑於彼新開

銅駝之街於我長閉何彼途甚易非勞於五丁我
路為難如登於九折地不私載何其爽歟而答旨
云還路無從斯所未喻二也晉熙廬江義陽安陸
皆云款附非復危邦計彼中途便當靜晏自斯以
北桴鼓不鳴自此以南封疆未壹如其境外脫殞
輕軀幸非邊吏之羞何在匹夫之命又此賓遊通
無貨殖忝非韓起聘鄭私買玉環吳札過徐躬要
寶劍由來宴錫凡厥囊裝行役淹留皆已虛罄散
有限之微財供無期之久客斯可知矣且據圖列

首愚者不為運斧全身庸流所鑒何則生輕一髮自重千鈞不以賈盜明矣骨肉不任充鼎俎皮毛不足入貨財盜有道焉吾無憂矣又公家遣使脫有資須本朝非隆平之時遊客豈皇華之勢輕裝獨宿非勞聚橐之儀微騎閒行寧望輜軒之禮歸人將從私具驢騾緣道亭郵唯希蔬粟若曰畱之無煩於執事遣之有費於官司或以顛沛為言或云資裝可懼固非通論皆是外篇斯所未喻三也又若以吾徒應還侯景侯景凶逆殲我國家天下含

靈人懷憤厲既不獲投身社稷衛難乘輿四冢磔蚩尤千刀剗王莽安所謂俛首頓膝歸奉寇讎佩珥腰鞬為其皂隸日者通和方敷曩睦凶人狙詐遂駭狼心頗疑宋萬之誅彌懼荀瑩之請所以奔蹄勁角專恣憑陵凡我行人偏膺讎憾正當殪筋醢骨抽舌探肝於彼凶情猶當未雪海內之所知也君侯之所具焉又聞本朝王公都人士女風行雨散東播西流京邑丘墟茲蓬蕭瑟偃師還望咸為草萊霸陵回首俱沾霜露此又君之所知也彼

以何義爭免寇讎我以何親爭歸委質昔鉅平貴
將懸重於陸公叔向名流深知於駸箴吾雖不敏
嘗慕前修不圖明庶有懷翻其以此量物昔魏氏
將亡群兇挺爭諸賢戮力想得其明為葛榮之黨
邪為邢杲之徒邪如曰不然斯所未喻四也假使
吾徒還為凶黨侯景生於趙代家自幽恒居則台
司行為連率山川形勢軍國彛章不勞請箸為籌
便當屈指能算景以逋逃小醜羊豕同群身寓江
臯家晉河朔春春井井如鬼如神其不然乎抑又

君之所知也且夫宮闈祕事並若雲霄英俊訐謨
寧非帷幄或陽譎以定策或焚藁而奏書朝廷之
士猶難參預羈旅之人何階耳目至於禮樂沿革
刑政寬猛則謳歌已遠萬舞成風不知手之舞之
足之蹈之也安在搖其牙齒為間謀者哉若謂復
命西朝終奔東虜雖齊梁有隔尉候奚殊豈以河
曲之難浮而曰江關之可濟河橋馬度寧非宋典
之姦闕路鷄鳴皆是田文之客何其通蔽乃爾相
妨斯所未喻五也又兵交使在雖箸前經儻同狗

僕之尤追肆寒山之怒則凡諸元帥並釋縲囚爰
及偏裨同無翦馘乃至鍾儀見赦朋笑遵途襄老
蒙歸虞歌引路吾等張旌拭玉修好尋盟涉泗之
與浮河郊勞至于贈賄公恩既備賓敬無違今者
何憊翻蒙貶責若以此為言斯所未喻六也若曰
祇氛永久喪亂悠然哀我奔波存其形魄固已銘
茲厚德戴此洪恩譬渤海而俱深方嵩華而猶重
但山梁飲啄非有意於籠樊江海飛浮本無情於
鍾鼓况吾等營魂已謝餘息空番悲默為生何能

支久是則雖蒙養護更天天年若以此為言斯所
未喻七也若云逆豎殲夷當聽反命高軒繼路飛
蓋相隨未解其言何能善謔夫屯亨治亂豈有意
於前期謝常侍今年五十有一吾今年四十有四
介已知命賓又杖鄉計彼後生有隨而已豈銀臺
之要彼未從師金竈之方吾知其訣正恐南陽菊
水竟不延齡東海桑田無由可望若以此為言斯
所未喻八也足下清襟勝託書囿文林凡自洪荒
終乎幽厲如吾今日寧有其人爰至春秋微宜商

略夫宗姬殄墜霸道昏凶或執政之多門或陪臣
之涼德故臧孫有禮翻囚與國之賓周伯無憊空
怒天王之使遷箕卿於兩館執繫驥子於三年斯匪
貪亂之風邪寧此當今之高例也至於雙嶠且帝四
海爭雄或備趙而侵燕或連韓而謀魏身求盟於
楚殿躬奪璧於秦庭輸寶鼎以託齊王馳安車而
誘梁客其外膏唇販舌分路揚鑣無罪無辜如兄
如弟逮乎中陽受命天下同規巡省諸華無聞幽
辱及三方之霸也孫甘言以媵媚曹屈詐以羈縻

於軫歲到於句吳冠蓋年馳於庸蜀則客嘲殊險
賓戲已深共盡遊談誰云猜忤若使搜求故實脫
有前蹤恐是叔世之姦謀而非為邦之勝略也抑
又聞之雲師火帝澆淳乃異其風龍躍麟譎王霸
雖殊其道莫不崇君親以銘物敦敬養以治民預
有邦司曾無隆替吾奉違溫清仍屬亂離寇虜猖
狂公私播越蕭軒靡御王舫誰持瞻望鄉關何心
天地自非生憑廩竹源出空桑行路含情猶其相
愍嘗謂擇官而仕非曰孝家擇事而趨非云忠國

况乎欽承有道驟駕前王郎吏明經鵠鳶知禮巡
省方化咸問高年東序西膠皆尊者蓋吾以圭璋
玉帛通聘來朝屬世道之屯期鍾生民之否運兼
年累歲無申元直之祈銜泣吞聲長對公閭之怒
情禮之訴將同逆鱗忠孝之言皆應齟舌是所不
圖也非所仰望也且天倫之愛何得忘懷妻子之
情誰能無累夫以清河公主之貴餘姚書佐之家
莫限高卑皆被驅略自東南醜虜杌敗饑民臺署
郎官俱餒墻壁况吾生離死別多歷暄寒孀室嬰

兒何可言念如得身還鄉土躬自推求猶冀提攜
俱免凶虐夫四聰不達華陽君所謂亂臣百姓無
冤孫叔敖稱為良相足下高才重譽參贊經綸非
豹非貔聞詩聞禮而中朝大議曾未矜論清禁嘉
謀安能相及諤諤非周舍容容類胡廣何其無諍
臣哉歲月如流平生何幾晨看旅鴈心赴江淮昏
望牽牛情馳揚越朝干悲而掩泣夜萬緒而回腸
不自知其為生不自知其為死也足下素挺詞鋒
兼長理窟匡丞相解頤之說樂令君清耳之談向

所諮疑誰能曉喻若鄙言為戮來旨必通分請灰釘耳從斧鑊何但規規默默齧舌低頭而已哉若一理存焉猶希矜眷何必期令我等必死齊都足趙魏之黃塵加幽并之片骨遂使東平拱樹長懷向漢之悲西洛孤墳恒表思鄉之夢干祇以屢哽慟增深

與王僧辯書

徐陵

太清陸年六月五日孤子徐君頓首昔者雲師火帝非無戰陣之風堯誓湯征咸用干戈之道至於

搖山蕩海驅電乘雷殲厥兇渠無虧皇極若夏鍾夷并周厄犬戎漢委珠囊秦亡寶劍然則皆聞之矣未有膺龍圖以建國御鳳印以承家二后欽明三靈交泰而天崩地折妖寇橫行者也自古銅頭鐵額興暴皇年構杙窮竒流災中國王彌石勒吞噬關河綠林青犢之群黑山白馬之衆校彼兵荒無聞前史八王故事曾未混淆九州春秋非云禍亂我皇受命中興光宅天下泰寧瑣瑣安敢執鞭建武棲棲何其扶轂抑又聞之陶唐既作天歸鳥

喙之臣豐畢將與特挺鷹揚之佐明公量苞金鉉
神表玉璜儷衮欽才平階佇德固以雷連管樂惆
悵風雲濡足維時枚竿斯在去歲兇徒不騁言次
巴丘鼓聲聞一柱之臺烽火照三休之殿公則懸
麾羽扇猶對投壺戎羯咸奔鯨鯢俱剪樓船萬軸
還繫昆明胡馬千群皆輸長樂於是乎夏首西浮
雲行電邁彭波東匯谷靜山空托鵲尾而據玉畿
登牛頭而掃天闕漸臺偽帥仍傳首於帝京郿塢
元兇咸割腸於軍市青羗赤狄同畀豺狼胡服夷

言咸為京觀公園陵盡拜忠貫長沙神主咸安勳
踰高密重以秦宮既獲魯殿猶存闢綠草於應門
開青槐於武庫長安五陵之族鄜杜六遷之民襁
負而歸都壘斯滿鬻脂藏脯遊騎繫鍾故市新城
飛薨華屋東莞舊宅人識桑榆南頓荒田家分禾
黍豈以鄉名穀熟邑號禾興而已哉若夫卦起龍
文書因鳥跡劬勞王室大拯生民自開闢以來未
之有也雖十六才子明允篤誠八百諸侯專心同
德中宗佐命俱畫丹青光武功臣皆懸星象棧道

木閣田單之奉霸齊綰重將兵周勃之扶強漢壞
蟲之比黃鵠轍鮒之仰河宗未足云也孤子階緣
多幸叨造皇華鄉國屯危公私焦迫邳彤之切長
亂心胸徐庶之析終無聞允既而屏居空館多歷
歲時鬻犯幽祗躬當勦滅何圖豐咎災極蒼旻號
慕煩冤肝腸屠殞酷痛柰何無狀柰何惟桑與梓
翻若天涯杖栢栽松悠然長絕明明日月號叫無
聞茫茫宇宙容身何所窮剝柰何自忝膺嘉聘仍
屬亂離上下年尊偏嬰此酷昔人迎門請盜恒懷

廢寢之憂當輓輿親猶有危途之懼况乎逆寇崩
騰京師播越興居動止長隔山河朝夕饘飩誰經
心眼程縻不繼原粟何資瞻望風雲朝夕嗚咽固
乃遊魂已謝非復全生餘息室番非為全死同水
魚之不絕似螻蟲之猶蘇良可哀也良可哀也自
東都紹漢南亳興啟修好徵兵彌留星館韓宣范
武方駕連鑣蘇秦張儀朱輪華轂而孤子三危是
擯四罪同科聽別馬而長號杖歸旌而永慟王稽
反命既無託乘之恩椒舉相逢誰為班荆之位昔

人違齊處魯時降徵求亡晉奔秦猶蒙招請問管
寧於遼左追王朗於浙東並物譽時賢卿門公族
懸須應務深挾清祈斯豈庸賤之儔耶非餘生之
敢望也但預在輜軒誠為過誤珪璋特達通聘河
陽貂珥雍容尋盟漳水差有黃門啟封非無青紙
詔書郡將州司郊迎負弩鄉亭里候飾館陳兵豈
是復介而奔齊寧當竊妻而逃晉已焉哉羗難得
而言也漢之谷吉捐軀者幾人楚之申胥埋魂者
何極孤子何所嘆焉但頓伏苦廬徒延光晷夫以

啁噍鸞雀躑躅鳴號含識懷靈未有其痛且夫曾
耕雨雪猶尚悲歌蘇使幽囚無馳哽噎公履忠弘
孝冠冕縉紳化感烟雲量標海岳行糜仲月王政
無寒分穀高年仁風斯遠固以衣纓仰訓黎庶投
懷今日譙惶彌布洪澤雖復孤骸不返方為漠北
之塵營魄如歸終結江南之草孤子徐君頓首

答徐陵書

李那

繁霜應管能響豐山之鍾玄雲觸石又動流泉之
奏矧伊物候且或冥符况乃襟期相忘道術楚齊

風馬吳會浮雲行李無因音塵不嗣殷御正銜命
來歸嘉言累札江南橘茂薊北桑枯陰慘陽舒行
止多福足下泰山竹箭浙水明珠海內風流江南
獨步扶風計吏議折祥禽平陵李蕙辯酬文約况
復麗藻星鋪雕文錦繡風雲景物義盡緣情經綸
憲章辭殫表奏久以京師紙貴天下家藏調移齊
右之音韻改河西之俗豈直揚雲藻翰獨畱千金
嗣宗文雅唯傳好事僕世傳經術才謝劉歆家有
賜書學匪班嗣弱年有意頻愛雕蟲歲月三餘無

忘肆業戶牖之間時安筆硯頰眉難巧學步非工
恒經牧孺之譏屢彼陳思之誚羞逢仲子顛居山
之鼓琴屢見子將同本初之車服不謂殷侯虛談
成價遂同布鼓輕嚮雷門燕石空雕終慙比德楚
軍雖拂實愧棲桐豈若邶邶舉袖唯聞變曲協律
飛塵必應不顧是以日南寶貝遙望歸秦合浦文
犀更希還漢芳春行獻鸞其鳴矣懸豫章之床置
長安之驛厚築墻垣思逢鄭僑之聘工歌周頌佇
奏延陵之樂書繒有復道意無伸李那頓首

與史祥書答

煬帝

煬帝遺祥書曰將軍總戎塞表胡虜清塵秣馬休
 兵猶事校獵足使李廣慙勇魏尚愧能冠彼二賢
 獨在吾子昔余濫舉推轂治兵振皇靈於塞外驅
 犬羊乎大漠于時同行軍旅契濶戎旃望龍城而
 衝冠眄狼居而發憤將軍英圖不世猛氣無前但
 物不遂心僂俛從事每一思此我勞如何將軍宿
 心素志早同膠漆久而敬之方成魚水近者陪隨
 鑾駕言旋上京本即還職南蕃宣條下國不悟皇

鑿曲發備位少陽戰戰兢兢如臨冰谷至如建節
 邊境征伐四方褰帷作牧緩撫百姓上稟成規下
 盡臣節是所願也是所甘心仰慕前修庶得自效
 謬其入守神器元良萬國身輕負重何以克堪所
 望故人匡其不逮比監國多暇養疾閑宮厭北閣
 之端居罷南皮之馳射博望之苑既乏名賢飛蓋
 之園理乖終宴親朋遠矣琴書寂然想望吾賢疹
 如疾首祥答書曰行人戾止奉所賜况恩紀綢繆
 形於文墨不悟飛雪增冰之地忽載三陽毛幘韋

韞之鄉俄聞九奏精駭思越莫知啟處祥少不學
軍旅長遇升平幸以先人緒餘備職宿衛懼駑蹇
無致遠之用朽薄非折衝之材豈欲追蹤古人語
其優秀曩者王師薄伐天人受服絕漠揚旌威震
海外當此之時猛將如雲謀夫如雨至若祥者列
於卒伍預聞指蹤之規得免逗遛之責循涯揣分
實為幸甚爰以情喻雷陳事方劉葛信聖人之屈
已非庸人之擬議何則川澤之大汗潦攸歸松栢
之高蔦蘿斯託微心眷眷孟侯所知也仰惟體元

良之德煥重離之暉三善克脩萬邦以正斯固道
高周誦契叶商皓豈在管蠡所能窺測伏承監國
多暇養德怡神咀嚼六經逍遙百氏追西園之愛
客眷南皮之出遊疇昔之恩無忘造次祥自忝式
過載罹寒暑身在邊隅情馳魏闕每至清風夕起
朗月孤照想鳴葭之啟路思託乘於後車塞表京
華山川悠遠瞻望浮雲伏增潛結

遺崔贖書并答

豫章王

豫章王遺贖書曰昔漢氏西京梁王建國平臺東

苑慕義如林馬卿辭武騎之官枚乘罷弘農之守
每覽史傳嘗切怪之何乃脫略官榮棲遲藩邸以
今望古方知雅志彼二子者豈徒然哉足下博聞
強記鉤深致遠視漢臣之三篋似涉蒙山對梁相
之五車若吞雲夢吾兄欽賢重士敬愛忘疲先築
郭隗之宮常置穆生之醴今者重開土宇更誓山
河地方七百牢籠曲阜城兼七十包舉臨淄大啟
南陽方開東閣想得奉飛蓋曳長裾藉玳筵躡珠
履歌山桂之偃蹇賦池竹之檀欒其崇貴也如彼

其風流也如此幸甚幸甚何樂如之高視上京有
懷德祖才謝天人多慙子建書不盡意寧俟繁辭
賸答曰臣昨伏奉教書榮賜非恒心靈自失若乃
理高象繫管輅思而不解事穹山海郭璞注而未
詳至於五色相宣八音繁會鳳鳴不足喻龍章莫
之比吳札之論周頌詎盡揄揚郢客之奏陽春誰
堪赴節伏惟令王殿下稟潤天潢承輝日觀雅道
貴於東平文藝高於北海漢則馬遷蕭望晉則裴
楷張華雞樹騰鸞池播美望我清塵悠然路絕

祖濬燕南贅客河朔情遊本無意於希顏豈有心
於慕蘭未嘗聚螢映雪懸頭刺股讀論唯取一篇
披莊不過盈尺復况桑榆漸暮藜藿屢空舉燭無
成穿楊盡棄但以燕求馬首薛養雞鳴謬齒鴻儀
虛班驥阜挾泰山而超北海比報德而非難堙崑
崙以為池也酬恩而反易忽屬周桐錫瑞唐水承
家門有將相樹宜桃李真龍將下誰好有名濫吹
先逃何須別聽但慈旨抑揚損上益下江海所以
稱王丘陵為之不逮曹植儻預聞高論則不隕令

名揚脩若切在下風亦詎虧淳德

召王貞書并答

王 暕

夫山藏美玉光照廊廡之間地蘊神劍氣浮星漢
之表是知毛遂穎脫義感平原孫慧文詞來迂東
海顧循寡薄有懷髦彥籍甚清風為日久矣未獲
披覲良深佇遲比高天流火早應涼颼陵雲仙掌
方承清露想躡衛攸宜與時休適前園後圃從容
丘壑之情左琴右書蕭散烟霞之外茂陵謝病非
無封禪之文彭澤遺榮先有歸來之作優游儒雅

何樂如之余屬當藩屏宣條楊越坐棠聽訟事絕
詠歌攀桂搗詞眷言高邀至於揚旌北渚飛蓋西
園託乘之應劉置醴闕申穆背淮之賓徒聞其語
趨燕之客罕值其人卿道冠鷹揚聲高鳳舉儒墨
泉海詞章苑圃棲遲衡泌懷寶迷邦狗茲獨善良
以於邑今遣行人具宣往意側望起予甚於饑渴
想便輕舉副此虛心無信投石之談空慕鑿坏之
逸書不盡言更慙詞費及貞至王以客禮待之朝
夕遣問安不又索文集貞啟謝曰屬荷德仁宣教

須少來所有拙文昔公旦之才藝能事鬼神夫子
之文章性與天道雅志傳於夏游餘波鼓於屈宋
雕龍之迹具在風騷而前賢後聖代相師祖賞逐
時移出門分路變清音於正始體高致於元康咸
言坐握蛇珠誰許獨為鱗角孝逸生於戰爭之季
長於風塵之世學無半古才不逮人往屬休明寸
陰已昃雖居可封之屋每懷貧賤之耻適鄢郢而
迷塗入邯鄲而失步歸來反覆心灰遂寒豈謂橫
議過實虛塵睿覽枉高車以載鼙費明珠以彈雀

遂得東糧三月重高門之餘地皆淮千里望章臺
之後塵與懸黎而並肆將駿驥而同阜終朝擊缶
匪黃鍾之所諧日暮却行何前人之能及顧想平
生觸塗多感但以積年沈痼遺忘日久拙思所存
纔成三十三卷仰而不至方見學仙之遠窺而不
覩始知遊聖之難咫尺天人周章不暇怖甚真龍
之降慙過白豸之歸伏紙陳情形神悚越

召徐則書

王廣


夫道得衆妙法體自然包涵二儀混成萬物人能
弘道道不虛行先生履德養空宗玄齊物深明義
味曉達法門悅性冲玄怡神虛白食松餌木棲息
烟霞望赤城而得風雲遊玉堂而駕龍鳳雖復藏
名台岳猶且騰實江淮藉甚嘉猷有勞寤寐欽承
素道久積虛襟側席幽人夢想巖穴霜風已冷海
氣將寒偃息茂林道體休念昔商山四皓輕舉漢
庭淮南八公來儀藩邸古今雖異山谷不殊市朝
之隱前賢已說導凡述聖非先生而誰故遣使人
徃彼延請想無勞束帛賁然來思不待蒲輪去彼

廣廣文選

卷之十五

六

空谷希能弗已竚望披雲



廣廣文選卷之十五

